

**Keputusan Pilihan Raya Umum Ke-13 sukar diramal  
Utusan Online  
30 Mac, 2012**

PUTRAJAYA 29 Mac - Bekas Perdana Menteri, Tun Dr Mahathir Mohamed berkata, keputusan Pilihan Raya Umum Ke-13 sukar diramalkan ekoran wujudnya pelbagai analisis sehingga menimbulkan kekeliruan di kalangan masyarakat.

Beliau berkata, ada sesetengah pihak menyatakan sokongan terhadap Barisan Nasional (BN) telah meningkat manakala di sebelah lain pula kata ada banyak rungutan terhadap BN.

"Kita sukar untuk meramalkan kerana situasi sekarang tidak seperti sebelum ini yang BN boleh menang dengan selesa pada pilihan raya umum.

"Tetapi saya yakin BN boleh menang tetapi adakah ia lebih baik berbanding pilihan raya umum 2008 atau memperoleh majoriti dua pertiga adalah satu persoalan yang sukar untuk diramalkan," katanya.

Beliau berkata demikian pada sidang akhbar selepas merasmikan Seminar Pendidikan Melayu Antarabangsa anjuran Universiti Malaysia Perlis (UniMAP) di sini, hari ini.

Turut hadir Ketua Menteri Melaka, Datuk Seri Ali Mohd Rustam; Menteri Besar Perlis, Datuk Seri Md. Isa Sabu dan Naib Canselor UniMAP, Datuk Prof. Dr. Kamarudin Hussin.

Antara analisis yang menjadi tumpuan adalah oleh bekas Menteri Kewangan, Tun Daim Zainuddin yang menyatakan BN boleh menang selesa di tiga buah negeri iaitu Johor, Melaka dan Pahang pada pilihan raya umum akan datang.

Ditanya mengenai adakah kesukaran BN memperoleh majoriti dua pertiga menjadi penyebab Perdana Menteri, Datuk Seri Najib Tun Razak masih belum mengumumkan tarikh pilihan raya, Mahathir tidak menolak ia satu kemungkinan.

"Tetapi saya tidak dapat baca apa yang ada pada fikiran Najib tetapi beliau nampak yakin," katanya.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0330&pub=Utusan\\_Malaysia&sec=Politik&pg=po\\_01.htm](http://www.utusan.com.my/utusan/info.asp?y=2012&dt=0330&pub=Utusan_Malaysia&sec=Politik&pg=po_01.htm)